

Inatsisissatut siunnersuummut nassuiaatit

Nalinginnaasumik nassuiaatit

1. Aallarniut

Inatsisartut 2010-mi ukiakkut ataatsimiinnerminni oqaluuserisassani immikkoortoq 68 akuersissutigaa, taanna tassaalluni inuusuttut nunanut allanut oqaatsinik ilinniariarlutik aallartartut amerlanerulernissaat anguniarlugu Naalakkersuisut suliamik aallartitsinissamik peqquneqarnissaannik Inatsisartut aalajangiiffigisassaattut siunnersuut.

Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaata siunnersuutip aappassaaneerseqarnissaanut isumaliutissiissummini oqaatigaa, Danmarkimi efterskolimiinneq imaluunniit nunami allamiinneq apeqqutaatinnagu, aningaasartuutit tamarmiusut kingunerisaraat, periarfissat taakku inuusuttunut ilaqutariinnit aningaasaqarnikkut pissarissaartuneersunut atorneqarnerusarnerat. Tamatumunnga atatillugu ataatsimiititaliamit oqaatigineqarpoq, ilinniartitaanikkut pilersaarummi tunngaviusumik isummamut aammalu ilinniartitaanerup pingaaruteqassusianik politikikkut oqariartuummut, tassalu ilinniartitaanerup inunnut ataasiakkaanut pinnani inuiaqatigiinnulli tamanut atuuttuuneranik oqariartuummut akerliusoq. Aammattaaq inuusuttut nunani allani ilinniartitaanerni naleqquttuni piginnaangorsarsinnaanerat eqqarsaatigalugu ilaqutariit ataasiakkaat aningaasaqarnerat toqqammavigineqartariaqanngitsoq aammalu taamaakkaluarpalluunniit inuit ataasiakkaat piginnaasaat inerisimassusiallu kiisalu ilinniarfiup ilisimaneqassusia tassunga atatillugu aalajangiisuusariaqartoq ataatsimiititaliaq tunngaviusumik isumaqartoq oqaatigineqarpoq.

Siunnersuutip piviusunngortinniarnerni Kalaallit Nunaanni efterskolernermut tapiissutit assigalugit nunani allaniinnernut tapiissutit angajoqqaat isertitaat malillugit annertussusilerneqarsinnaanerannut periarfissat suunersut Naalakkersuisunit misissorneqassasoq ataatsimiititaliaq isumaliutissiissummi naggasiullugu kaammattuivoq.

Naalakkersuisut aappassaaneerinerneqarnermut akissuteqaamminni nalunaarutigaaq ataatsimiititaliap inassuteqaataa tusaatissatut tiguneqartoq, aammalu ilinniagaqarnerisutit pillugit inatsisissap nutaap 2011-mi Inatsisartut ataatsimiinneranni saqqummiunneqartussap suliarineqarnerani suliaq tamanna Naalakkersuisunit ilanngunniarneqartoq. Siunnersuut taanna 2011-mi Inatsisartut upernaakkut ataatsimiinneranni saqqummiunneqarpoq. Naalakkersuisut saqqummiussinerminni nalunaarutigaaq, siunnersuutip suliarineranut atatillugu siunertamut naapertuunnerusutut isigineqartoq, oqaluuserisassani UKA2010/68 oqaatsinik ilinniarnissaq

siunertaralugu nunani allaniittarnermut tungasoq, inatsit naapertuunnerusoq alla aqqutigalugu piviusunnngortinneqarpat, tamannalu ilimagineqartoq piviusunnngortinneqassasoq efterskolit pillugit Inatsisartut inatsisaata allannngortinnera aqqutigalugu.

2. Inatsisissatut siunnersuummi immikkoortut pingaarnerit

a) Inatsisit atuuttut

Efterskolinut tunngasut Efterskolit pillugit Inatsisartut inatsisaanni nr. 13, 5. december 2008-meersumi, kiisalu Kalaallit Nunaanni efterskolinut kiisalu efterskolimiinnermut tapiissuteqartarneq pillugu Namminersorlutik Oqartussat nalunaarutaanni nr. 13, 3. september 2009-meersumi aammalu Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaanni nr. 14, 3. september 2009-meersumi maleruagassiorneqarput.

Aammattaaq Danmarkimi efterskolimiinnermut tapiissutinik pissarsisoqarsinnaavoq tamanna pillugu danskit maleruagqusaat malillugit. Aammattaaq taakku folkehøjskolit, efterskolit, husholdningskolit aamma håndarbejdskolit (tunngaviumik atuarfiit namminersortitat) pillugit nalunaarutikkut nr. 689, 22. juni 2011-meersukkut kingusinnerusukkullu inatsisikkut nr. 271, 27. marts 2012-meersukkut aammalu inatsisikkut nr. 379, 28. april 2012-meersukkut allannguuteqartinneqartukkut, kiisalu atuartunut efterskolimiittunut naalagaaffiup tapiissutai pillugit nalunaarutikkut nr. 604, 24. juni 2009-meersukkut aammalu folkehøjskolinut, efterskolinut, husholdningsskolinut håndarbejdsskolinullu (tunngaviumik atuarfiit namminersortitat) nalunaarutigineqarput.

Paarlaasseqatigiinnernut tapiissutit Ilinniagaqarnersiutit pillugit Namminersornerullutik Oqartussat nalunaarutaanni nr. 8, 27. marts 2008-meersumi § 58 naapertorlugu tunniunneqartarput. Aalajangersagaq ima oqaasertaqarpoq:

”§ 58. Qaammatit arfinillit sinnerlugit sivissuseqartumik Kalaallit Nunaata Danmarkillu avataanni paasisassarsiornerit ilinniartitaanermut attuumassuteqanngitsut nunallu tamalaat ilinniartunik paarlaasseqatigiissitsisarnernut suliniaqatigiiffiinit aqqissuunneqartunut atatillugu Kalaallit Nunaanni aalajangersimasumik najugarisap nunamilu allami ornigassap akornanni siumut utimullu akiliussisoqartassaaq.

Imm. 2. Københavnip nunamilu allami ornigassap akornanni angalanermut aningaasartuutit § 52-imi maleruagassatut aalajangersakkat naapertorlugit aningaasartuutigisimasanut uppersaammik takutitsinikkut utertinneqarsinnaapput.

Imm. 3. Ilinniagaqartup ilaqaatani qaniginerusaani napparsimaruluttoqartillugu toqusoqartilluguluunniit angalanerq allanit matussuserneqanngippat § 50-imi maleruagassat aalajangersarneqartut naapertorlugit siumut utimullu angalanermut akiliussisoqartassaaq, taamaattorli taamaallaat Københavnimiit pineqartup ilaqaataasa qaninnerit najugaqarfiannut.”

Aammattaaq tamanna pillugu danskit maleruaqqusat malillugit paarlaasseqatigiinnermut tapiissutinik pissarsisoqarsinnaavoq. Maleruaqqusat taakku inuusuttunut 18-it inorlugit ukiulinnut paarlaasseqatigiittarnermut tapiissutit pillugit nalunaarummiipput.

b) Siunnersuut

Paarlaasseqatigiittarnermut tapiissutit pillugit maleruaqqusat efterskolit pillugit Inatsisartut inatsisaannut ilanngunneqarnissaat Naalakkersuisunit tulluurtuutinneqarpoq, tassami paarlaasseqatigiittarnermi aammalu Danmarkimi efterskolernermi siunnerfigineqartut pingaarnertigut assigiimmata. Taakku tamarmik inuusuttunut 18-it inorlugit ukiulinnut Kalaallit Nunaata avataani atuarfimmiiinnisaminnik kissaateqartunut naatsorsuussaapput, ilinniakkatigut ineriartornissamut, tassunga ilanngullugu oqaatsinik ilinniarnissamut inuttullu inerisarnissamut tunngavissanik imaqarlutik.

Taamaattorli paarlaasseqatigiinneq ilinniarnivittut ilinniagaqarnersiutit pillugit maleruaqqusatigut nassuiarneqartut paasineqassanngilaq, aammalumi ilinniartup nunami allamiinneranut ilinniagaqarnersiuteqartitsisoqartanngilaq, taamaattumillu ilinniagaqarnersiutit pillugit maleruaqqusani tapiissutinut tunngavissap peerneqarnissaa tulluurtuussaaq, tamatumunngalu taarsiullugu efterskolit pillugit inatsimmut ilanngullugu.

Siunnersuutikkut saqqummiunneqartukkat efterskolernermut inatsimmi paarlaasseqatigiinnermut tapiissuteqarnissamut inatsisitigut tunngavissaqalissaaq aammalu tapiissutit tamarmiusut annertussusaat ukiut tamaasa Aningaasanut Inatsimmi aalajangerneqartassapput.

Aammattaaq tapiissutinik tunniussisarneq, tapiissutit annertussusaat, isertitaqqortussuseq naapertorlugu akiliuteqartarsinnaaneq, qinnuteqarnermi periusissat aamma maalaarnissamut aqqutissat pillugit malittarisassanik aalajangersaanissamut Naalakkersuisut peqquneqarnerannik kinguneqartumik piginnaatitsinermut aalajangersagaq ilanngunneqarpoq. Tamanna pillugu inatsisip allanngortinneqarnerata atuutilerana peqatigalugu nalunaarummik atuutsitsilernissaq naatsorsuutigineqarpoq.

Inatsisip qulequtaata allanngortinneqarnissaanik siunnersuuteqarnissaq naapertuuttutut isigineqarpoq, taamaalilluni tassani efterskolit paarlaasseqatigiittarnermullu tapiissutit pineqartut takuneqarsinnaassamat. Aammattaaq paarlaasseqatigiittarneq qanoq paasineqassanersoq pillugu inatsimmi nassuiaanissaq naapertuuttutut isigineqarpoq.

Kiisalu isertitaqqortussuseq naapertorlugu akiliuteqartoqarsinnaasoq aalajangersakkami malittarisassani ilanngullugu aalajangersarneqarsinnaasoq Danmarkimi efterskolernermut tapiissutit pillugit piginnaatitsinermut aalajangersakkami erseqqissaatigineqassasoq tulluartautinneqarpoq. Periarfissap tamatuma maanna atorneqarnissaa pilersaarutigineqangilaq, tassa efterskolernermut tunngasut tamaasa nalinginnaasumik nalilersorneqaaqarnissaat Naalakkersuisut sulissutigilersaarmassuk.

Allannguutissat taaneqartut saniatigut Namminersorlutik Oqartussat eqqunneqarnerisa kingorna oqaatsit atorneqartut nutaat kingunerisaannik siunnersuutigineqarpoq siunnersuutip qallunaatuuani "Landsstyret" allanngortinneqassasoq imaalersillugu: "Naalakkersuisut" aammalu "Namminersornerullutik Oqartussat" "Namminersorlutik Oqartussat"-nut allanngortinneqassasoq. Taamatuttaaq "Inatsisartit Aningaasanut Inatsisaat" "Aningaasanut Inatsit"-mut allanngortinneqarnissaa siunnersuutigineqarpoq. Aammattaaq siunnersuutigineqarpoq atuarfik pillugu "inatsisartut peqqussutaat" allanngortinneqassasoq atuarfik pillugu "malittarisassat"-nut, tassami atuarfik pillugu aqqissuussinerup atuuttup allanngortinneqarnissaa naatsorsuutigineqarmat, taamaalilunilu inatsisip qulequtaa ima allanngortinneqassammat "Atuarfik pillugu Inatsisartut inatsisaat".

Kiisalu kapitalit ilaata qulequtaata oqaasertai allanngortinneqarput, taamaalilluni kapitalimi takuneqarsinnaaluni taanna Danmarkimi efterskolernermut paarlaasseqatigiinnermullu tapiissutinut attuumassuteqartoq.

Allannguutit skemanngorlugit ima isikkoqarput:

Inatsisissatut siunnersuut inatsimmut maanna atuuttumut sanilliullugu	
<i>Oqaasertat maanna atuuttut</i>	<i>Inatsisissatut siunnersuut</i>
	§ 1 Efterskolit pillugit Inatsisartut inatsisaanni nr. 13, 15. december 2008-meersumi imaattunik allannguisoqarpoq:
Efterskolit pillugit Inatsisartut inatsisaat	1. Inatsisip <i>qulequtaa</i> ima oqaasertalerneqassaaq: "Efterskolit aamma paarlaasseqatigiittarnermut tapiissutit pillugit Inatsisartut inatsisaat"
	2. § 1-ip kingornagut kapitali 1-imi

	<p>ilanngunneqassaaq: ”§ 1a. Paarlaasseqatigiinneq tassaavoq inuusuttut 18-it inorlugit ukiullit Kalaallit Nunaata Danmarkillu avataaniinnerat, inuusuttut ilinniakkatigut, inuttut naalagaaffiillu akimorlugit kulturit pillugit piginnaasaannik nukittorsaannissamik siunertaqartoq.</p>
<p>Kapitali 5 <i>Kalaallit Nunaata avataani efterskolernermut tapiissutit</i></p>	<p>3. <i>Kapitali</i> 5-imut qulequtaq ima oqaasertalerneqassaaq: <i>“Danmarkimi efterskolernermut aamma paarlaasseqatigiittarnermut tapiissutit”</i></p>
<p>§ 20 <i>Imm. 2.</i> Naalakkersuisut Danmarkimi efterskolernernut tapiissutit tunniunneqarnissaat pillugu malittarisassanik aalajangersaassapput, tassunga ilanngullugit tapiisarnissamut piumasaqaatit, tapiissutit annertussusaat, qinnuteqarnermi periusissat aamma maalaarnissamut aqutissat.</p>	<p>4. § 20, <i>imm. 2</i> ima oqaasertalerneqassaaq: ”Imm. 2. Naalakkersuisut Danmarkimi efterskolernernut tapiissutit tunniunneqarnissaat pillugu malittarisassanik aalajangersaassapput, tassunga ilanngullugit tapiisarnissamut piumasaqaatit, tapiissutit annertussusaat, isertitaqqortussuseq naapertorlugu akiliuteqartarnek, qinnuteqarnermi periusissat aamma maalaarnissamut aqutissat.”</p>
	<p>5. Kapitali 5-imi § 20-p kingorna ilanngunneqassaaq: ”§ 20a. Naalakkersuisut paarlaasseqatigiinnermut atatillugu aningaasartuutitut tapiissuteqarsinnaapput. Tapiissutit tamarmiusut annertussusaat ukiut tamaasa Aningaasanut Inatsimmi aalajangerneqartassapput. <i>Imm. 2.</i> Naalakkersuisut paarlaasseqatigiinnernut tapiissutit tunniunneqarnissaat pillugu malittarisassanik aalajangersaassapput, tassunga ilanngullugit</p>

	tapiisarnissamut piumasagaatit, tapiissutit annertussusaat, isertitaqqortussuseq naapertorlugu akiliuteqartarsinnaaneq, qinnuteqarnermi periusissat aamma maalaarnissamut aqqutissat.”
<p>§ 1</p> <p><i>Imm. 4.</i> Efterskolit, ilinniartunik atuarfik pillugu peqqussut naapertorlugu atuartitaasussaataasunik ilinniartortaassagunik, ilinniartunut taakkununga atuartitsineq nalinginnaasumik meeqqat atuarfianni piumasagaataasunut nallersuussinnaasoq neqeroortigissavaat.</p> <p>§ 14</p> <p><i>Imm. 4.</i> Naalackersuisut aalajangersinnaavaat, ilinniartunut tapit <i>Namminersornerullutik Oqartussat</i> ataanni suliffeqarfimmit immineertumit allaffissornikkut isumagineqassasut, ilinniartunullu tapit allaffissornikkut ingerlannissaannut pisussaaffiliisinnaallutik.</p>	<p>6. Inatsisip qallunaatuaani tamarmi ”Landsstyret” allanngortinneqassaaq imatut: ”Naalackersuisut”. Inatsisartit inatsisaanni tamarmi “Inatsisartut Aningaasanut Inatsisaat” “Aningaasanut Inatsisit”-mut allanngortinneqassapput aamma “Inatsisartut Aningaasanut Inatsisaa” “Aningaasanut Inatsit”-mut. § 1, <i>imm. 4</i>-mi ”Inatsisartut peqqussutaat” allanngortinneqassaaq imatut: ”malittarisassat” aammalu § 14, <i>imm. 4</i>-mi ”Namminersornerullutik Oqartussat”: ima allanngortinneqassaaq ”Namminersorlutik Oqartussat”.</p>
	<p>§ 2</p> <p>Inatsisartut inatsisaat atuutilissaaq 1. januar 2013.</p>

3. Aningaasaqarnikkut allaffissornikkullu pisortanut sunniutissat

Soqanngilaq.

Efterskolernermit aammalu paarlaasseqatigiinnermut tapiissutitut atatillugu aningaasaqarnikkut sinaakkutissat inatsisissatut siunnersuutip kingunerisaanik allannguuteqarnissaat naatsorsuutigineqanngilaq.

4. Aningaasaqarnikkut allaffissornikkullu inuussutissarsiutinik ingerlatsisunut sunniutissat

Soqanngilaq.

5. Avatangiisinut, pinngortitamut innuttaasullu peqqissuunissaannut sunniutissat

Soqanngilaq.

6. Innuttaasunut kingunerisassat

Inatsisissatut siunnersuut innuttaasunut immiini sunniuteqassanngilaq.

Paarlaasseqatigiittarnermut tapiissutit pillugit malittarisassat efterskolit pillugit Inatsisartut inatsisaannut ilanngunneqarnerisigut aammalu tamatuma kingorna tamanna pillugu allaffissornikkut malittarisassanik aalajangersaanikkut malittarisassat ersarinnerulissapput, tamatumalu saniatigut paasiuminarnerulissallutik.

Tapiissutininut atatillugu isertitaqqortussuseq naapertorlugu akiliuteqartitsisalernissamik naatsorsuutiginninnerup kingunerissavaa aningaasaqarnikkut atugarissaartunut tapiissutit annikillisinneqassammata aammalu aningaasaqarnikkut pissakinnerusunut tapiissutit amerlineqassammata. Kingulliullugu taaneqartunut kingunerissavaa taakku paarlaasseqatigiinnissamut periarfissaasa pitsaanerulernerat, taamaalillunilu aamma naatsorsuutigineqarluni inuusuttut amerlanerit paarlaasseqatigiittarnermi peqataasalissasut.

7. Sunniutissat annertuut allat

Soqanngilaq.

8. Oqartussaasunut kattuffinnullu il.il. tusarniaaneq

Siunnersuut piffissami 31. Majimiit 6. julimut 2012 makkununga tusarniaassutigineqarpoq:

Naalakkersuisut Siulittaasuata Naalakkersuisoqarfia (NSN)

Ineqarnermut, Attaveqarnermut Angallanermullu Naalakkersuisoqarfik (IAAN)

Aningaasaqarnermut Naalakkersuisoqarfik (AN)

Aalisarnermut, Piniarnermut Nunalerinermullu Naalakkersuisoqarfik (APNN)

Inuussutissarsiornermut Sulisoqarnermullu Naalakkersuisoqarfik (ISN)

Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik

Peqqissutsimut Naalakkersuisoqarfik (PN)

Nunamut namminermut, Pinngortitamut Avatangiisinullu Naalakkersuisoqarfik (NNPAN)

Aatsitassanut Pisortaqarfik

Nunanut Allanut Pisortaqarfik

Nunatsinni Nakorsaaneqarfik

Nuuk Internationale Friskole

Knud Rasmussenip Højskolia

Sulisartut Højskoliat

GU-Aasiaat
HTX-Sisimiut
GU-Nuuk
GU-Qaqortoq
NUSUKA
Savimminilerinermik Ilinniarfik
Sanaartornermik Ilinniarfik
INUILI
Umiartornermik Ilinniarfik
NI-Nuuk
NI-Qaqortoq
Peqqissaanermik Ilinniarfik
Ilisimatusarfik
Perorsaanermik Ilinniarfik
Oqaatsinik Pikkorissarfik
Savaatilissat Ilinniarfiat
Piniarnermut Aalisarnermullu Atuarfik
Eqqumiitsuliornermik Ilinniarfik
Aarhusimi Kalaallit Illuat
Odensemi Kalaallit Illuat
Aalborgimi Kalaallit Illuat
Københavnimi Kalaallit Illuat
Kalaallit Nunaanni Sulisitsisut Peqatigiiffiat(GA)
SIK
KANUKOKA
IMAK
AK
PIP
Ilinniagartuut Kattuffiat (ASG)
Avalak
KIK
Kisaq
Efterskolit Peqatigiiffiata Allattoqarfia (Efterskoleforeningens sekretariat)
Maniitsup Efterskolia
Villads Villadsenip Efterskolia

Tusarniaanermi akissutit makkunannga takkussimapput:

Aningaasaqarnermut Naalackersuisoqarfik, Inuusutissarsiornermut Sulisoqarnermullu Naalackersuisoqarfik, Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfik, Nunatsinni Nakorsaaneqarfik, Aarhusimi Kalaallit Illuat, PIP, KANUKOKA, GA, SIK, IMAK, Meeqqat Illersuisuat Efterskolit Peqatigiiffiallu.

Tusarniaanermi akissutit siunnersuummik allannguinnissamat pissutitssaqartitsinngillat.

Tusarniaanermi akissutit ilanngussaq 1-imi ilanngullugu nassiunneqartumi aamma oqaaseqarfigineqarput.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1. Inatsisip maanna atuuttup qulequtaa ersarissarneqarpoq, taamaalilluni erseqqissumik takuneqarsinnaalerluni paarlaasseqatigiittarnermut tapiissutit inatsimmi aamma pineqartut.

Nr. 2. Tamanna oqaatsimut "paarlaasseqatigiittarneq"-mut nassuiaataavoq. Immikkut oqaatigineqarpoq paarlaasseqatigiinnermi siunertarineqartoq tassaasoq inuusuttut ilinniakkatigut, inuttut naalagaaffiillu akimorlugit kulturit pillugit piginnaasaannik nukittorsaanissaq. Ilinniakkatigut pissarsiassaq aalajangersakkami tassani taaneqartoq pingaartumik tassaavoq oqaatsinik ilinniarnissaq. Taamaattorli ilinniagassaqarfiusinnaasunik naleqquttut isigineqartunik mattussinissaq pinngitsoortinniarlugu oqaaseqatigiit "ilinniakkatigut pissarsiassat" toqqarneqarpoq.

Nr. 3. Kapitalip qulequtaatigut erseqqissaatigineqarpoq immikkoortumi tassani taamaallaat pineqarmat Danmarkimi efterskolerneq, kiisalu paarlaasseqatigiinneq aamma ilanngunneqarmat. Allanguummut siulliullugu taaneqartumut tunngavilersuutigineqarpoq Danmarkimi efterskolernermit taamaallaat tapiissuteqartoqartarmat.

Nr. 4. Danmarkimi efterskolernermit tapiissutinut atatillugu isertitaqqortussuseq naapertorlugu akiliuteqartitsisinnaanermut aalajangersakkami ilanngullugu periarfissiisoqarpoq. Isertitat aalajangersakkami pineqartut tassaapput angajoqqaat isertitaat. Tamatumunnga pissutaavoq efterskolit pillugit inatsisip nutarterneqarnerani siunnerfigineqartut tassaammata inuusuttut 18-it inorlugit ukiullit, angajoqqaaminnit

pilersorneqartussaataasut.

Nr. 5. Inatsisitigut aalajangersagaq tamanna tassaavoq paarlaasseqatigiinnissamut tapiissuteqarnissamik periarfissamik ammaassisoq. Aalajangersakkakut qulakkeerneqassaaq paarlaasseqatigiittarnermut ukiumoortumik aningaasat qanoq amerlatigisut Inatsisartunit aalajangersarneqassammata. Tapiissutinik pissarsinissamut atugassarititaasut erseqinnerusut pillugit nalunaarusiornissamut Naalakkersuisut aalajangersakkakut peqquneqarput. Danmarkimi efterskolernermut tapiissutit assigalugit paarlaasseqatigiittarnermut tapiissutit pillugit sinaakutissatut piumasqaatit ingerlaavartumik pisariinnerusumik nutarterneqartarnissaat pillugu nalunaarut aqutigalugu erseqqinnerusumik malittarisassiornissaq toqqarneqarpoq.

Nr. 6. Inatsit maanna atuuttoq Namminersorlutik Oqartussat eqqunneqannginneranni atuuttuummat oqaatsit iluarsineqarnissaat pisariaqarpoq. Tamatuma saniatigut atuarfik pillugu Inatsisartut peqqussutaat taamani atuuttoq malittarisassanit allanit taarserneqarpoq, taamaattumillu oqaatsip ”Inatsisartut peqqussutaata” oqaatsimik ”malittarisassat” taarserneqarnissaa siunnersuutigineqarpoq.

§ 2-mut

Inatsisissatut siunnersuutip 1. januar 2013-imi atuutsinneqalertussatut akuersissutigineqassasoq siunnersuutigineqarpoq. Tamatumunnga pissutaavoq ukiumit atuarfiusumit 2013/2014-imit atuutilersumik paarlaasseqatigiittarnermut tapiissutit pillugit aaqquisuussamik nutaamik atuutsitsilernissamik kissaateqarneq.